

SERBSKE **N**OWINY

www.serbske-nowiny.de

WUTORU, 16. AWGUSTA 2016

NJEWOTWISNY WJEČORNIK ZA SERBSKI LUD

LĚTNIK 26 · ČISŁO 158 · 0,40 EUR

Z dobrotami zlutniwje wobchadźeć

Budyšin (CS/SN). Zapóstanča CDU w zwjazkowym sejmje Marja Michałkowa bě wčera hósć Budyskeje sekcije hospodarskeje rady CDU, zo by wo swoim dźěle w sejmje rozprawjała a na prašenja wobdźělnikow wotmołwiła. Hospodarska rada CDU ma so za posrědkowarja mjez politiku a hospodarstwom. Marja Michałkowa mjez druhim powědaše, zo bě hakle njedawno ze zwjazkowym strowotniskim ministrom w USA. Tam je so wo digitalizowanju w strowotnistwje kraja wobhoniła. Dokelž kładže wulku wažnosť na dialog z wobydlerjemi, wěnuje zapóstanča počojcu swojeho dźěloweho časa dźětu we wólbny mokrjesu, počojcu časa je w Berlinje.

Byrnjež so hospodarstwo w Němskej tuchwilu derje wuwijało a bjezdźělnosć mała była, je Marja Michałkowa za to, z dobrotami za ludźi zlutniwje wobchadźeć. Wšako maja so te dobroty tež w špatnych časach dale financować.

Wobdźělnicy zarjadowanja chcychu mjez druhim wědźeć, kak sej zapóstanča přichod we wjesnych kónčinach předstaja a kak hodźało so tomu zadźěwać, zo młodži ludžo do wulkoměstow čahnu. Michałkowa namjetowaše, wjace twarsich ležownosćow wupokazać a dźělowe městna w bliskosći wutworić. Spěšny internet móhl k tomu přinošować, zo móža ludžo tež doma dźělać. Digitalizowanški program zwjazkoweho knježerstwa je za to dobry zakład, Michałkowa zwurazni. Zwjazkowe knježerstwo pak njemóže wšitke problemy rozrisać. Jednotliwe kraje dyrbja so tež same starać, wona rjekny.